

vobis, annuntiet, anathema sit. Hæc apertissimè docent, officium Doctorum in Ecclesia Christi esse, docere purum Dei verbum.

*Primum officium Doctorum.*

Hanc doctrinam confirmant exempla cum Patriarcharum & Prophetarum, tum Christi Servatoris nostri, & Apostolorum. Quid illi in Ecclesia Dei docuerunt? verbum Dei solum, præterea nihil, quatenus scilicet ad salutem necessarium videbatur. Adamus docuit filios suos, quæ ipse edoctus fuerat à Deo optimo, & suo conditore. Seth, Enos, & reliqui deinceps, usq; ad diluuium, idem verbum Dei, quod ab Adamo audierant, docuerunt filios suos; & filii nepotes, & pronepotes. A diluuiio usq; ad Mosen, Noë, Sem, Abrahã, Isaac, & alii Patriarchæ, quid docuerunt filios suos? verbum Dei idem, quod ipsi didicerant à maioribus suis. Gen. 8. Dominus de Abrahamo ipso testatur hoc, dicens: *Num celabo Abrahamum, quæ ego facturum sum, cum Abrahamus omnino futurus sit in Gentem magnam? Deinde addit Dominus: Hoc quoque scio, quòd mandaturus sit filiis suis, & domui suæ post se, ut custodiant viam Domini, faciantque iustitiam.* Moses verò non tantum nihil docuit in Ecclesia Dei sibi concredita, quàm purum Dei verbum: sed ipsum etiam literis mandavit, ut illud semper in Ecclesia extaret, unde posteri omnes, quæ sit Dei voluntas, facilè agnoscerent. Nec verò aliud Prophetæ docuerunt populos, quàm verbum Dei, quod vel legerant in libris Moïsi, vel audierant ab ipso Domino Deo. Hinc voces illæ: *Factum est verbum Dei ad me. Hæc dicit Dominus. Luc. 1. Factum est verbum Domini ad Iohannem Zachariae filium, in deserto.*